

# GRUPO MUNICIPAL



**MARÍA DEL CARMEN MOREIRA MARTÍNEZ**, Vicevoceira do Grupo Municipal MAREA PONTEVEDRA, presenta diante do Pleno do Concello de Pontevedra, para o seu debate e aprobación, se procede, a seguinte PROPOSICIÓN ao abeiro dos artigos 67, 117 e 118 do Regulamento Orgánico do Pleno e das súas Comisións, solicitando que se **INCREMENTE A PARTIDA ORZAMENTARIA E O NÚMERO DE PRAZAS DAS BOLSAS DE COMEDOR E SE INSTE Á XUNTA DE GALICIA A QUE CUMpra COAS SÚAS OBRIGAS RECOLLIDAS NO DECRETO 132/2013 QUE REGULA OS COMEDORES ESCOLARES.**

## EXPOSICIÓN DE MOTIVOS

Unha das necesidades básicas e primordiais que teñen as persoas é poder alimentarse dun xeito nutritivo, especialmente nas idades temperáns do seu desenvolvemento evolutivo. As circunstancias socioeconómicas de moitas familias de Pontevedra son de pobreza, entendida como a **falta de recursos económicos para acceder a bens e servizos básicos**. A pobreza fai que non sexan quen de poder satisfacer as necesidades básicas de primeira orde: alimentación, vestimenta, facturas de luz e da auga, recibos da hipoteca ou do alugueiro, materiais escolares...

As familias sen recursos atópanse nunha situación de especial **vulnerabilidade social**, e iso xéralles inseguridade e indefensión nas súas condicións de vida e dificultades no manexo de recursos e estratexias para afrontar o que están vivindo. De aí a importancia da administración local, como entidade pública de amparo e salvagarda das familias e da infancia.

A Constitución Española, no seu artigo 39, establece a **obligatoriedade dos poderes públicos de asegurar a protección social, económica e xurídica da familia**. A lei 13/2008, do 2 decembro, de Servizos Sociais de Galicia, no artigo 11, establece as funcións dos servizos sociais comunitarios básicos (entre outras, a atención das situacións individuais e a participación na xestión das prestacións económicas). Ademais, a lei 3/2011, do 30 de xuño, de Apoio á familia e convivencia de Galicia, no artigo 50, regula que lle corresponden ás entidades locais, a detección, valoración e intervención nas situacións de risco de calquera índole, e mais a activación dos seus propios recursos ou en colaboración coas demais administracións e servizos públicos e privados.

Os **comedores escolares** xurdiron, por unha banda, como un instrumento para dar resposta á situación de desvantaxe social e económica de moitas familias, e por outra como medida da conciliación da vida laboral e familiar. A Xunta de Galicia, a través da Consellería competente en materia de educación, regula no Decreto 132/2013, do 13 de agosto de 2013, os comedores escolares dos centros docentes públicos non universitarios.

Desde a Área de Benestar Social do Concello de Pontevedra, durante o curso académico, **finánciase entre 24 e 26 prazas, ás que se lles suman outras 26** a través do convenio coa Federación Provincial de ANPA de Centros Públicos de Pontevedra (FANPA), para os comedores escolares. Pero ese número de prazas resulta **insuficiente para a lista de espera existente**. Ademais, durante os meses de verán (xullo, agosto e setembro), ante o peche destes comedores, púxose en marcha un **programa de repartición de alimentos**, con periodicidade quincenal, para que os nenos e nenas necesitados tivesen, polo menos, unha comida nutritiva ao día. En total, neste período, as **familias atendidas foron de 120 e 218 menores de idade** (cun notable incremento sobre o ano anterior, 2014, cando foron atendidas 88 familias e 178 nenos e nenas).

Estes datos seguen a amosar unha **realidade de empobrecemento das familias pontevedresas motivada pola falta de emprego e precariedade laboral**, e converte nunha necesidade urxente ampliar tanto o orzamento coma o número de prazas sufragadas para os comedores escolares. Deste xeito, e sempre tendo en conta as propostas de valoración técnica do persoal dos Servizos Sociais Comunitarios, poderanse atender as necesidades das familias que quedan na lista de espera e, asemade, dotar de máis prazas a oferta o longo do curso académico, permitindo a incorporación de novas familias, de ser o caso.

#### **POR TODO ISO, MAREA PONTEVEDRA PRESENTA A SEGUINTE PROPOSICIÓN:**

1. Incrementar a partida orzamentaria e o número de bolsas de comedor ofertadas desde o Concello, para poder cubrir tanto as necesidades das familias en situación de emerxencia social que están lista de espera, coma as de novas incorporacións.
2. Instar a Xunta de Galicia a que cumpra coas súas obrigas ao respecto, recollidas no decreto 132/2013 que regula os comedores escolares.

Pontevedra, 13.10.2015

A Vicevoceira do Grupo Municipal de Marea Pontevedra

**MARÍA DEL CARMEN MOREIRA MARTÍNEZ**